

MEMORANDWM CYDSYNIAD DEDDFWRIAETHOL ATODOL

(MEMORANDWM RHIF 2)

Y BIL AWDURDODAU CYHOEDDUS (TWYLL, GWALLAU AC ADENNILL)

1. Gosodir y memorandwm cydsyniad deddfwriaethol hwn o dan Reol Sefydlog ("RhS") 29 sy'n rhagnodi bod rhaid gosod memorandwm cydsyniad deddfwriaethol, ac y ceir cyflwyno cynnig cydsyniad deddfwriaethol, gerbron Senedd Cymru os yw Bil gan Senedd y DU yn gwneud darpariaeth mewn perthynas â Chymru sy'n rhoi sylw i faterion datganoledig.
2. Cyflwynwyd y Bil Awdurdodau Cyhoeddus (Twyll, Gwallau ac Adennill) ("y Bil") yn Nhŷ'r Cyffredin ar 22 Ionawr 2025. Gosodwyd LCM ar 7 Chwefror 2025 a gellir dod o hyd iddo yn <https://senedd.cymru/media/tkjmay3q/lcm-ld16978-w.pdf>
3. Digwyddodd Ail Ddarlleniad y Bil yn Nhŷ'r Cyffredin ar 3 Chwefror 2025.
4. Ar 21 Chwefror 2025, cyhoeddwyd sawl gwelliant i'r Bil ("gwelliannau 21 Chwefror 25"). Mae dau o'r gwelliannau 21 Chwefror 2025 yn bodloni'r prawf fel y'i nodir yn RhS 29.2 ("y Prawf RhS29") ac maent yn destun y Memorandwm Cydsyniad Deddfwriaethol Atodol hwn.
5. Mae'r Bil bellach wedi cyrraedd y cyfnod Pwyllgor yn y Tŷ cyntaf.

Amcanion Polisi

6. Mae amcanion polisi datganedig Llywodraeth y DU yn parhau fel y'u nodwyd yn y Memorandwm Cydsyniad Deddfwriaethol cyntaf a osodwyd ar 7 Chwefror 2025. ([lcm-ld16978-e.pdf](#)).

Crynodeb o'r Bil

7. Noddir y Bil gan yr Adran Gwaith a Phensiynau a Swyddfa Cabinet y DU.
8. Darparwyd crynodeb o'r Bil yn y Memorandwm Cydsyniad Deddfwriaethol cyntaf, ac mae'n dal yn gywir.
9. Mae swyddogion Llywodraeth Cymru a swyddogion Llywodraeth y DU wedi parhau i fod mewn cysylltiad rheolaidd mewn perthynas â'r gwaith o ddatblygu'r Bil, gan gynnwys mewn perthynas â gwelliannau gan Lywodraeth y DU sy'n effeithio ar Gymru.

Darpariaethau yn y Bil y mae angen cydsyniad ar eu cyfer

10. Cymalau'r Bil fel y'u cyflwynwyd sy'n bodloni'r Prawf RhS29 oedd 1, 2, 5, 6, 7 (ac Atodlen 1), 9, 10, 64, 65, 67 a 69 (ac Atodlen 2). O'r darpariaethau hyn, noder bod cymalau 1, 2, 7 (ac Atodlen 1), 9, 64, 65 a 69 (ac Atodlen 2) wedi'u

nodi gan Lywodraeth y DU fel rhai y mae arnynt angen LCM mewn gohebiaeth ryngweinidogol.

Y diweddaraf am y sefyllfa ers cyhoeddi'r Memorandwm Cydsyniad Deddfwriaethol cyntaf

11. Yn dilyn Ail Ddarlleniad y Bil ar 3 Chwefror 2025 cyhoeddodd Llywodraeth y DU welliannau i'r Bil ar 21 Chwefror (gwelliannau 21 Chwefror). Gellir gweld y gwelliannau hyn drwy'r ddolen ganlynol:

https://publications.parliament.uk/pa/bills/cbill/59-01/0167/amend/public_authority_rm_pbc_0221.pdf

12. Mae dau o'r gwelliannau 21 Chwefror yn bodloni'r prawf RhS29:

- (a) Gov 1 - Byddai'r gwelliant hwn yn cyfyngu cwmpas cymal 6 y Bil gyda'r effaith mai dim ond y PSFA allai wneud cais am ganiatâd i gasglu data cyfathrebu mewn perthynas ag ymchwiliadau o dan y Bil (yn hytrach nag, o dan eiriad y cymal fel y'i cyflwynwyd, "the Cabinet Office"). Gallai'r ymchwiliadau hynny ymwneud â thwyll yn erbyn Awdurdodau Cymreig Datganoledig (DWAs). Bodlonodd cymal 6 y Prawf RhS29 adeg ei gyflwyno ac roedd yn destun y Memorandwm Cydsyniad Deddfwriaethol cyntaf. Gan fod y gwelliant yn newid cwmpas darpariaeth sy'n bodloni'r Prawf RhS29, mae'r gwelliant ei hun hefyd yn bodloni'r prawf hwnnw.
- (b) Gov 3 - Mae'r gwelliant hwn yn newid cwmpas cymal 67(3) a oedd, fel y'i cyflwynwyd, yn bodloni'r Prawf RhS29 ac a oedd yn destun y Memorandwm Cydsyniad Deddfwriaethol cyntaf. Ar hyn o bryd, mae cymal 67 yn darparu bod rhaid cymryd darpariaeth yn y Bil i ystyriaeth wrth benderfynu a yw "datgelu, cael neu ddefnyddio" data o dano, yn torri deddfwriaeth diogelu data. Byddai'r gwelliant yn darparu bod cymal 67(3) yn gymwys i'r holl waith prosesu data o dan ddarpariaeth yn y Bil, nid yn unig "datgelu, cael neu ddefnyddio". Mae'n ddigon posibl y bydd Awdurdodau Cymreig Datganoledig yn datgelu neu fel arall yn prosesu gwybodaeth o dan y Bil. Bodlonodd cymal 67 y Prawf RhS29 adeg ei gyflwyno ac roedd yn destun y Memorandwm Cydsyniad Deddfwriaethol cyntaf. Gan fod y gwelliant hwn yn newid cwmpas cymal sydd eisoes yn destun LCM yn sylweddol, mae'n bodloni'r Prawf SO29.

Casgliad

13. Rwyf o'r farn ei bod yn briodol ymdrin â'r darpariaethau hyn mewn Bil gan y DU. Mae'r ddeddfwriaeth yn gyson â ffocws Llywodraeth Cymru ar ddiogelu arian cyhoeddus rhag twyll a gwallau. Felly, rwyf yn argymhell y dylai Senedd Cymru gefnogi'r cynigion a rhoi ei chydsyniad.